

05 NOV 2000

PENYAIR DIRAI KENDURI SEMPENA HARI PUISI NASIONAL

LANGKAWI, 5 Nov (Bernama) -- Seramai 250 penyair dari dalam dan luar negeri hari ini diraikan pada majlis kenduri tradisional di Kampung Bayas, Ulu Melaka di sini sempena Hari Puisi Nasional ke XV di Kampung Tok Senik Resort di sini.

Hari puisi tiga hari yang dirasmikan oleh Perdana Menteri Datuk Seri Dr Mahathir Mohamad malam semalam, berakhir hari ini.

Tetamu yang hadir termasuk dari Afrika Selatan, Britain, wakil-wakil negara Asean seperti Indonesia, Brunei dan Thailand yang kagum dengan kenduri yang diadakan bersempena majlis berkhatan dua orang cucu tuanrumah Ismail Man, 51.

Penyair Indonesia juga berminat mendapat resepi kerabu yang turut dihidangkan pada majlis itu.

Sebelum itu, ketibaan rombongan penyair itu disambut dengan gendang silat dan diserikan dengan majlis berzanji dan marhaban.

Hari puisi merupakan perhimpunan rasmi para penyair nasional yang dimulakan pada 1971 di Pantai Kundur, Tanjung Keling, Melaka dan yang terakhir di Seremban pada tahun lepas.

Sementara itu, Ismail Petersen, 76, dari Cape Town Afrika Selatan berhasrat memperkenalkan Malaysia dan Langkawi ke negaranya menerusi karya puisi.

"Saya gembira dapat melawat negara ini dan akan kembali lagi di masa datang", katanya yang telah mendeklamasikan puisi berjudul "Ingatan Afrika dan Asia" hasil karya beliau sendiri yang disampaikan dalam bahasa Malaysia pada satu majlis semalam.

-- BERNAMA
ZI NH PR